

Memahami Konsep Muslimah Mithali Dalam Al-Quran:

Satu Analisa

Wan Fakhrol Razi Wan Mohamad

wanfakhrolrazi@kuis.edu.my

Muhammad Faiz Mukmin Abdul Mutalib

faizmukmin@kuis.edu.my

Hamzah Omar

hamzah@kuis.edu.my

ABSTRAK

Penghormatan Islam terhadap muslimah jelas terbentang dalam al-Quran sehingga ada surah yang membincangkan soal-soal wanita. Surah itu dinamakan an-Nisa' bererti "surah wanita". Ini menunjukkan soal wanita tidak diabaikan oleh Allah. Wanita muslimah mithali adalah wanita yang terdidik dengan sifat yang baik, lemah lembut, sopan santun dan luhur budi pekertinya, memiliki akidah yang mantap, tidak mudah terpengaruh dengan godaan, sentiasa berpegang dengan kebenaran dan mengikut ajaran Allah tanpa ada bantahan dan penyelewengan yang boleh membawa mereka ke jalan yang sesat. Dalam era masa kini, ramai wanita yang kurang mempraktikkan agama dengan baik. Ini kerana, zaman semakin moden dan canggih yang membuatkan mereka terlalu ikut akan 'trend' masa kini. Sebagai contoh dari sudut pemakaian, cara menutup aurat, adab pergaulan, akhlak dan sebagainya. Oleh itu, Agama Islam meletakkan tanggungjawab dan kewajipan syara' yang mesti disempurnakan oleh muslimah sebagai perintah daripada Allah. Jika perkara ini dapat difahami dan dilaksanakan dengan betul, sudah tentu mereka boleh mencapai darjah sebaik-baik manusia melalui amal ketaqwaan kepada Allah.

Kata Kunci: Konsep, Muslimah, Mithali, Al-Quran.

ABSTRACT

Islamic honors towards muslimah are clearly presented in the Quran until there are surahs discussing the questions of women. The surah is named an-Nisa' meaning "female surah". This shows that women are not ignored by Allah. Muslimah mithali are women who are educated with good nature, gentle weakness, courteousness and lurking of his sense, possessing a steady faith, not easily influenced by temptation, always sticking to the truth and following the teachings of Allah without any protests and irregularities that can bring them to a way. In today's era, many women are less practiced religiously well. This is because, times are becoming increasingly modern and sophisticated that makes them too follow the current 'trend'. For example, from the point of edition, how to close the awrah, manner of mixing, morals etc. Thus, The Religion of Islam undermines the responsibilities and obligations of syara' which must be executed by Muslims as an order from Allah. If this matter is understandable and implemented properly, of course they can achieve the best degree of mankind through a charity of deeds to God. Hence, this study was conducted to see the students' understanding of the concept of muslimah mithali in the Quran. The study used a quantitative method approach based on field methods by distributing questionnaires to respondents, then formulating through data obtained through questionnaires against FPPI students in the final semester. The findings showed that students' understanding of the concept of muslimah mithali was at a very satisfying level. The average student understands enough about this concept.

Key words: Concept, Muslimah, Mithali, The Quran.

1. PENDAHULUAN

Sebuah hadis yang diriwayatkan daripada Abdullah bin 'Amr RA, bahawa Nabi SAW pernah bersabda: **الدُّنْيَا مَتَاعٌ وَخَيْرُ مَتَاعِ الدُّنْيَا الْمَرْأَةُ الصَّالِحَةُ**

yang bermaksud: "Dunia adalah perhiasan dan sebaik-baik perhiasan dunia adalah wanita solehah." (Hadis Riwayat Muslim, No.715). Imam al-Qurthubi menjelaskan makna wanita yang solehah dalam hadits di atas ialah wanita yang menggembirakan suami apabila dilihat, mentaatinya apabila disuruh, dan memelihara kehormatan suaminya apabila ketiadaannya pada diri dan juga hartanya. (Lihat al-Mufhim, 4/221).

Sebuah puisi Inggeris yang popular yang menggambarkan betapa indahnya perbandingan ciptaan wanita itu dijadikan daripada tulang rusuk lelaki. Marilah sama-sama kita renungkan: "Wanita diciptakan dari tulang rusuk lelaki, Bukan dari kepalanya, untuk mengunggulinya, Tidak juga dari kakinya untuk dipijak-pijak, Namun diciptakan insan bernama wanita itu, Dari sisinya untuk menjadi teman yang setara, Dari bawah lengannya untuk dilindungi Dan dari kedudukan yang amat hampir dengan jantungnya untuk dikasihi.."

Muslimah bermaksud perempuan yang beragama Islam (lebih halus) dan juga kata lawan bagi lelaki yang beragama Islam. Manakala mithali pula berkaitan dengan seseorang yang boleh dijadikan contoh atau diteladani (Aziah Tajudin, 2016). Wanita muslimah itu adalah wanita yang terdidik dengan sifat yang baik dan luhur budi pekertinya, mereka sentiasa mengikuti ajaran Allah SWT tanpa ada bantahan dan penyelewengan yang boleh membawa mereka ke jalan yang sesat (Amina Noor, 1999). Akidah seorang wanita Islam yang solehah dan mithali itu mantap dan tidak mudah terpengaruh dengan godaan yang boleh menyesatkan, mereka sentiasa berpegang dengan kebenaran Allah SWT dan agama

Islam. Mereka sentiasa menjaga peribadi dan maruah sebagai wanita Islam, mereka juga menghayati Islam serta mendalami lagi ilmu agama mereka. Penghormatan Islam terhadap muslimah jelas terbentang di dalam al-Quran sehingga ada surah yang membincangkan soal-soal wanita. Surah itu dinamakan an-Nisa' bererti "surah wanita". Ini menunjukkan soal wanita tidak diabaikan oleh Allah SWT.

Firman Allah dalam surah al-Ahzab ayat 35:

إِنَّ الْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ وَالْقَنَاتِ وَالصَّادِقِينَ وَالصَّادِقَاتِ وَالصَّابِرِينَ وَالصَّابِرَاتِ وَالْخَاشِعِينَ وَالْخَاشِعَاتِ وَالْمُتَصَدِّقِينَ وَالْمُتَصَدِّقَاتِ وَالصَّامِتِينَ وَالصَّامِتَاتِ وَالْخَافِظِينَ فُرُوجَهُمْ وَالْخَافِظَاتِ وَالذَّاكِرِينَ اللَّهَ كَثِيرًا وَالذَّاكِرَاتِ أَعَدَّ اللَّهُ لَهُمْ مَغْفِرَةً وَأَجْرًا عَظِيمًا ۝ ٣٥

Yang bermaksud: "Sesungguhnya orang-orang lelaki Islam serta orang-orang perempuan Islam, dan orang-orang lelaki yang beriman serta orang-orang perempuan yang beriman, dan orang-orang lelaki yang taat serta orang-orang perempuan yang taat, dan orang-orang lelaki yang benar serta orang-orang perempuan yang benar, dan orang-orang lelaki yang sabar serta orang-orang perempuan yang sabar, dan orang-orang lelaki yang merendah diri (kepada Allah) serta orang-orang perempuan yang merendah diri (kepada Allah), dan orang-orang lelaki yang bersedekah serta orang-orang perempuan yang bersedekah, dan orang-orang lelaki yang berpuasa serta orang-orang perempuan yang berpuasa, dan orang-orang lelaki yang memelihara kehormatan dirinya serta orang-orang perempuan yang memelihara kehormatan dirinya, dan orang-orang

lelaki yang menyebut nama Allah banyak-banyak serta orang-orang perempuan yang menyebut nama Allah banyak-banyak, Allah telah menyediakan bagi mereka semuanya keampunan dan pahala yang besar.”

Setiap wanita yang beriman tentu mengharapkan dirinya menjadi wanita yang bermaruah dan terbaik, dari itu untuk menuju ke arah itu setiap wanita harus sadar akan kepentingan dirinya sebagai wanita Islam yang tahu menjaga maruah dan dapat pula berbakti kepada kaum keluarga serta negara. Mereka tahan diuji dan tabah menghadapi dugaan Allah. Tidak mudah putus asa, sentiasa berusaha dan berserah kepada Allah SWT. Perempuan yang baik-baik itu bukanlah perempuan yang sempurna, namun mampu menguatkan kesabaran demi zuriat yang disayangnya. Inilah persis Maryam AS. Tidak sempurna keyakinannya, namun mampu meneguhkan hatinya kerana percaya akan janji Allah SWT. Inilah persis ibu Nabi Musa AS. Tidak sempurna masa silamnya, namun demi mengejar peluang syurga, dia sanggup korbankan segalanya. Inilah persis Zulaikha (Muhammad Syaari, 2019). Wanita yang baik itu sanggup menjadi isteri yang baik, ibu dan pekerja yang baik serta bertindak sebagai srikandi negara yang gigih. Banyak kisah wanita yang telah dicatatkan dalam sejarah tentang kejayaan, dan ketabahan mereka menghadapi dugaan yang berbagai-bagai dalam hidup sebagai wanita Islam yang tulin. Ramai wanita yang berperanan besar disebalik tabir peristiwa-peristiwa besar dunia (Amina Noor, 1999).

2. CIRI-CIRI WANITA MITHALI

Dalam pembentukan tamadun, golongan wanita seharusnya memahami tugas dan peranan utama membentuk dan mendidik jiwa agar manusia

mampu menghasilkan kemakmuran di muka bumi ini. Kebahagiaan hidup hanya dapat dinikmati apabila manusia berjaya memenuhi keperluan yang tertentu seperti keperluan fizikal, mental, emosi, sosial dan rohani. Dalam kehidupan berkeluarga, isteri yang baik, iaitu yang tahu dan melaksanakan tugas dan peranannya yang baik adalah merupakan unsur penting kearah mencapai kebahagiaan hidup. Sabda Rasulullah yang diriwayatkan oleh Ibnu Hibban: “Empat perkara yang membawa kebahagiaan ialah isteri yang baik, rumah yang luas, jiran yang baik dan kenderaan yang selesa.” Sabdanya lagi sebagaimana yang diriwayatkan oleh al-Dailami: “Empat perkara yang membahagiakan seseorang ialah isteri yang solehah, anak-anak yang terdidik, sahabat yang baik dan rezeki yang ada di negeri sendiri”. (Nik Haslinda Nik Hussain 2017).

Firman Allah dalam surah An-Nisa’ ayat 34:

الرِّجَالُ قَوُّمُونَ عَلَى النِّسَاءِ بِمَا فَضَّلَ اللَّهُ بَعْضَهُمْ عَلَى بَعْضٍ ۚ وَبِمَا أَنْفَقُوا مِنْ أَمْوَالِهِمْ
فَالصَّالِحَاتُ قَانِتَاتٌ حَافِظَاتٌ لِّلْغَيْبِ بِمَا حَفِظَ اللَّهُ ۚ وَالَّتِي تَخَافُونَ نُشُوزَهُنَّ فَعِظُوهُنَّ
وَأَهْجُرُوهُنَّ فِي الْمَضَاجِعِ وَاضْرِبُوهُنَّ فَإِنْ أَطَعْنَكُمْ فَلَا تَبْعُوا عَلَيْهِنَّ سَبِيلًا ۚ إِنَّ اللَّهَ كَانَ
عَلِيمًا كَبِيرًا ۝ ٣٤

Yang bermaksud: “.....Maka perempuan yang solehah itu ialah yang taat (kepada Allah dan suaminya), dan yang memelihara (kehormatan dirinya dan apa jua yang wajib dipelihara) ketika suami tidak hadir bersama, dengan pemeliharaan Allah dan pertolongan-Nya. Dan perempuan yang kamu bimbang melakukan perbuatan derhaka (nusyuz)

hendaklah kamu menasihati mereka, dan (jika mereka berdegil) pulaulah mereka di tempat tidur, dan (jika masih degil) pukulah mereka (dengan pukulan ringan yang bertujuan mengajarnya) kemudian jika mereka taat kepada kamu, maka janganlah kamu mencari jalan untuk menyusahkan mereka. Sesungguhnya Allah Maha tinggi, lagi Maha besar.”

Wanita solehah menurut ayat di atas adalah wanita yang taat kepada Allah dan taat kepada suaminya. Namun di sini perlu diperluaskan dan diperincikan lagi. Untuk lebih teratur, ciri-ciri tersebut adalah seperti berikut:

2.1 Taat Kepada Allah S.W.T

Tidak dinafikan, antara wanita dan lelaki ada perbezaannya, tetapi ia bukanlah perbezaan mutlak. Bagaimanapun, sisi persamaan wanita dan lelaki ialah mereka diciptakan untuk menjadi hamba serta khalifah Allah. Firman Allah SWT yang bermaksud: “Dan aku tidak menciptakan jin dan manusia melainkan supaya mereka mengabdikan diri kepada-Ku.” (Surah al-Zariyat, ayat 56).

Terdapat beberapa sudut ketaatan yang perlu dilakukan oleh seorang muslimah mithali antaranya:

i. Mesti Mempunyai Aqidah Yang Bersih: Seorang wanita mithali mestilah mempunyai aqidah yang salimah iaitu bersih dari segala macam bentuk kesyirikan, bersih dari pemahaman-pemahaman yang menyelisihi aqidah ahli sunnah wal jamaah iaitu aqidah yang diyakini oleh Rasulullah SAW, para sahabat, tabi'in dan tabi' tabi'in serta para ulama yang thiqah (Abu Ahmad Fatanah, 2009).

Nabi Muhammad SAW pernah bersabda:

كنت رديف النبي صلى الله عليه وسلم على حمار فقال لي: يا معاذ أتدري ما حق الله

على العباد وما حق العباد على الله قلت: الله ورسوله أعلم قال: حق الله على العباد أن

Yang bermaksud: Daripada Muaz bin Jabal

katanya: “Aku pernah satu kali membonceng seekor keldai bersama Rasulullah s.a.w. Baginda bertanya kepada aku: “Wahai Muaz, tahukah engkau apakah hak Allah ke atas hamba dan hak hamba ke atas Allah?” aku menjawab “Allah dan Rasul-Nya lebih mengetahui.” Baginda bersabda: “Hak Allah ke atas hamba ialah hendak dia beribadat kepada-Nya dan jangan mensyirikkan-Nya.” (HR Al-Bukhari dan Muslim). Dari hadis ini jelas menunjukkan bahawa seseorang yang bergelar muslim itu mestilah bersih aqidahnya dari sebarang kesyirikan.

ii. Mesti Melakukan Ibadah Yang Sohik dan Betul: Ibadah tidak akan menjadi betul jika ianya tidak didasari dengan niat yang ikhlas, semata-mata kerana Allah untuk mencari redha-Nya dan mengikuti Rasul yang membawa dan menyampaikan tata cara pelaksanaan ibadah. Maka kewajipan umat Islam semuanya adalah meneladaninya dan masih banyak lagi bentuk-bentuk ibadah yang mesti dilakukan khususnya para wanita mithali seperti hadis Rasulullah SAW: إِنَّ اللَّهَ لَا يَنْظُرُ إِلَى صَوْرَتِكُمْ

Yang bermaksud: Sesungguhnya

Allah tidak melihat (menilai) kepada bentuk kamu, juga tidak kepada

harta benda kamu tetapi Allah melihat (menilai) kepada hati kamu dan amalan kamu.” (Sahih Muslim, no. hadis: 4651).

Sebagai contoh seperti firman Allah SWT dalam surah al-Ahzab ayat 35 yang telah penulis nyatakan dalam pengenalan bahawa dalam ayat ini terdapat ciri-ciri wanita muslimah solehah dan mithali yang taat kepada Allah dalam menjalankan ibadah kepada-Nya iaitu:

- i. Mereka yang tunduk kepada Allah dan taat kepada-Nya.
- ii. Membenarkan apa yang dibawa oleh Rasulullah kepada mereka.
- iii. Mentaati Allah dalam apa yang diperintahkan dan dilarang.
- iv. Bersabar dalam keadaan lapang dan sempit dengan tetap teguh.
- v. Hatinya berasa takut akan seksaan-Nya.
- vi. Menunaikan hak-hak Allah dari hartanya (bersedekah).
- vii. Berpuasa pada bulan Ramadhan.
- viii. Menjaga kemaluannya kecuali kepada suami-suaminya.
- ix. Sentiasa ingat kepada Allah.

Salah satu contoh untuk sentiasa ingat dan taat kepada Allah adalah dengan memperbanyakkan berdoa kepada-Nya. Ini kerana, doa ialah permohonan seorang hamba kepada Zat yang Maha Tinggi, yang telah menciptakan dirinya, iaitu Allah SWT. Dalam doa, ada pengakuan terhadap sifat Maha Kuasa-Nya. Di dalam doa juga ada ketundukan dan kepatuhan seorang hamba terhadap Tuhannya, sekaligus pengakuan atas kelemahan si pendoa kepada-Nya (Al-Sutha, 2014).

Doa ialah salah satu ibadah. Oleh itu, ternyata dengan banyak berdoa merupakan salah satu amalan mulia yang dapat membawa pelakunya meraih syurga Allah SWT. Ini kerana berdoa merupakan salah satu perintah-Nya sehingga sesiapa pun yang melaksanakannya, maka itu merupakan bentuk ketaatannya kepada-Nya. Balasan ketaatan kepada-Nya ialah syurga.

Memperbanyakkan zikir kepada Allah juga merupakan salah satu cara untuk taat kepada-Nya. Ini kerana, berzikir kepada-Nya mempunyai manfaat dan keutamaan yang sangat besar. Antaranya adalah dapat menghembuskan ketenangan batin dan kedamaian di hati. Banyak berzikir juga jadi penyebab datangnya keberuntungan dan kelapangan rezeki. (Al-Sutha, 2014). Sesuai dengan firman Allah SWT dalam surah al-Ra'd ayat 28: *الَّذِينَ ءَامَنُوا وَتَطْمَئِنُّ قُلُوبُهُمْ بِذِكْرِ اللَّهِ أَلَا بِذِكْرِ اللَّهِ تَطْمَئِنُّ الْقُلُوبُ*

Yang bermaksud: “(Iaitu) orang-orang yang beriman dan tenang tenteram hati mereka dengan zikrullah ketahuilah dengan zikrullah itu, tenang tenteramlah hati manusia.”

2.2 Mempunyai Akhlak Yang Mulia

Rasulullah SAW diutus Allah untuk menyempurnakan akhlak mulia di tengah-tengah kehidupan umat manusia seperti maksud hadis: “Sesungguhnya aku diutus untuk menyempurnakan akhlak mulia.” (Hadis Riwayat Baihaqi)

Justeru, Muslim atau muslimah perlu menjadi penunjuk nilai kepada akhlak mulia dalam kehidupan, sekali gus menonjolkan jati diri

keislaman. Hanya dengan keadaan ini, barulah mereka benar-benar mendokong risalah yang dibawa Baginda secara sepenuhnya.

Di antara perkara yang termasuk bahagian akhlak yang mesti dimiliki seorang wanita muslimah mithali adalah seperti berikut:

i. Menutup aurat dan tidak berhias untuk mempamerkan kecantikan melainkan dalam rangka ketaatan. Salah satu ciri wanita mithali adalah berpakaian taqwa, penampilannya sederhana, sopan, tidak suka berlebihan dan jauh dari sifat menunjuk-nunjuk (Abu Ahmad Fatanah, 2009). Allah SWT berfirman dalam surah al-Ahzab ayat 59:

يَا أَيُّهَا النَّبِيُّ قُلْ لِّأَزْوَاجِكَ وَبَنَاتِكَ وَنِسَاءِ الْمُؤْمِنِينَ يُدْنِينَ عَلَيْهِنَّ مِنْ جَلِيبِهِنَّ ذَٰلِكَ أَذَىٰ أَنْ

يُعْرَفْنَ فَلَا يُؤْذَيْنَ وَكَانَ اللَّهُ غَفُورًا رَّحِيمًا

Yang bermaksud: “Wahai Nabi, suruhlah isteri-isterimu dan anak-anak perempuanmu serta perempuan-perempuan yang beriman, supaya melabuhkan pakaiannya bagi menutup seluruh tubuhnya (semasa mereka keluar); cara yang demikian lebih sesuai untuk mereka dikenal (sebagai perempuan yang baik) maka dengan itu mereka tidak diganggu dan (ingatlah) Allah Maha Pengampun lagi Maha Mengasihani.”

Kecantikan seorang muslimah mithali bukan dinilai pada paras wajah atau bentuk tubuh badannya tetapi ianya lebih dari itu. Tingkah laku dan budi pekertinya yang mulia, serta ketakwaan memberi erti kecantikan yang sebenar dan lebih mendalam. Kejahilan tentang nilai dan pengertian kecantikan yang hakiki menyebabkan ramai wanita Islam terjerumus ke dalam kancah kehidupan yang lebih berpandukan kepada hawa nafsu,

keangkuhan dan takbur. Hukum dan peraturan menutup aurat membuktikan bahawa Islam memelihara dan meletakkan wanita pada tahap kemuliaan yang tinggi. Jika wanita masih tidak menyedari perkara ini dan menilai kehebatan, kebijaksanaan serta kebolehan mereka berdasarkan kecantikan, nyata mereka sendiri merendah-rendahkan diri mereka. Wanita begini mudah dipersendakan oleh orang lain terutamanya oleh golongan lelaki. Sikap terlalu berbangga dengan kecantikan diri boleh mendorong wanita memperdagangkan tubuh mereka. Sikap begini akhirnya pasti merugikan mereka sendiri (Siti Nor Bahyah Mahamood & Ida Ezyani Othman, 2008). Wanita perlu bijak dan menunjukkan ketegasan supaya masyarakat menghormati dan memandang tinggi kepada mereka. Kecantikan mengikut pandangan Islam bukan dinilai pada kecantikan tubuh badan semata-mata. Keperibadian yang mulia dan sifat-sifat kerohanian yang murni adalah lebih utama (Saodah Abd Rahman, 2010). Islam tidak menetapkan bentuk atau warna pakaian untuk dipakai, baik ketika beribadah atau di luar ibadat. Islam hanya menetapkan bahawa pakaian itu mestilah bersih, menutup aurat, sopan dan sesuai dengan akhlak seorang Muslim. Islam tidak menetapkan fesyen pakaian tetapi perlu mematuhi garis panduan dan menutup aurat. Pakaian juga mempunyai hubungan kait dengan keimanan dan ketaatan seorang wanita dengan Allah. Wanita yang mengambil berat soal pakaiannya dan menjaga aurat serta kehormatannya akan mendapat keuntungan daripada Allah. Sebaliknya, wanita yang tidak menutup aurat dan berpakaian dengan gaya yang menonjol apabila berada di luar rumah, bukan sahaja dimurkai Allah tetapi juga merosakkan hubungannya dengan Allah (Naurah Muhd Sa'id, 2011).

ii. Tidak berhias dan bertingkah laku seperti wanita jahiliyah (Abu Ahmad Fatanah, 2009). Firman Allah SWT dalam surah al-Ahzab ayat 32-33:

يُسَاءُ النَّبِيِّ لِسُنٍّ كَأَحَدٍ مِّنَ النِّسَاءِ إِنِ اتَّقَيْتُنَّ فَلَا تَخْضَعْنَ بِالْقَوْلِ فَيَطْمَعَ الَّذِي فِي قَلْبِهِ مَرَضٌ وَقُلْنَ قَوْلًا مَّعْرُوفًا ۚ ٣٢ وَقَرْنَ فِي بُيُوتِكُنَّ وَلَا تَبَرَّجْنَ تَبَرُّجَ الْجَاهِلِيَّةِ الْأُولَىٰ وَأَقِمْنَ الصَّلَاةَ وَآتِينَ الزَّكَاةَ وَأَطِعْنَ اللَّهَ وَرَسُولَهُ إِنَّمَا يُرِيدُ اللَّهُ لِيُذْهِبَ عَنْكُمُ الرِّجْسَ أَهْلَ الْبَيْتِ وَيُطَهِّرَكُمْ تَطْهِيرًا ۚ ٣٣

Yang bermaksud: “Wahai isteri-isteri Nabi, kamu semua bukanlah seperti mana-mana perempuan lain kalau kamu tetap bertaqwa. Oleh itu janganlah kamu berkata-kata dengan lembut manja (semasa bercakap dengan lelaki asing) kerana yang demikian boleh menimbulkan keinginan orang yang ada penyakit dalam hatinya (menaruh tujuan buruk kepada kamu), dan sebaliknya berkatalah dengan kata-kata yang baik (sesuai dan sopan). Dan hendaklah kamu tetap diam di rumah kamu serta janganlah kamu mendedahkan diri seperti yang dilakukan oleh orang-orang jahiliyah zaman dahulu.....”

Tetap tinggallah di rumah kamu (wahai para wanita), kerana itu lebih selamat dan lebih terjaga bagi kalian. “Dan janganlah berhias seperti orang-orang Jahiliyyah terdahulu”. Iaitu janganlah banyak keluar dengan berhias atau memakai wangian seperti kebiasaan orang-orang Jahiliyyah terdahulu yang tidak berilmu dan tidak memiliki agama. Semua ini untuk mencegah keburukan dan penyebabnya. Setelah Allah memerintahkan

mereka untuk bertakwa secara umum, dan Allah mengkhususkan dengan menyebut takwa kerana wanita amat memerlukannya. (As-Sa'di, 2003).

Para ulama Syafi'i menyatakan bahawa perkataan "qarna" dapat diertikan sebagai tinggal tetap di dalam rumah atau tinggal di dalam rumah dengan kemuliaan dan keselamatan. Manakala perkataan 'tabarruj' bermaksud menampakkan perhiasan dan keindahan tubuh atau dengan maksud berjalan dengan gaya, bermegah-megahan dan sebagainya (Abu Ahmad Fatanah, 2009).

iii. Tidak keluar bersendirian dan tidak pula bersama lelaki lain. Namun, seorang wanita dibenarkan untuk keluar rumah apabila ia mempunyai keperluan yang dibolehkan oleh syara'. Sebagai contoh untuk kebaikan seperti menuntut ilmu, berdakwah, silaturrahim, bekerja dan sebagainya. Tetapi hendaklah ia menjaga segala tata tertib yang ditetapkan oleh Allah selama ia keluar. (Ibn Taimiyyah, 2001).

iv. Berbuat baik kepada kedua ibu bapa. Ini bukanlah sekadar melaksanakan kewajipan dan perbuatan membalas jasa. Bahkan tercurah betapa indahnya kasih sayang yang dibalas oleh anak terhadap ibu bapa yang di situ terdapat seribu satu keberkatan hidup. Kejayaan dan kemuliaan hidup seorang anak juga sangat bergantung kepada perbuatan dan kelakuan mereka terhadap ibu bapa mereka. Firman Allah dalam surah al-Isra ayat 23:

وَقَضَىٰ رَبُّكَ أَلَّا تَعْبُدُوا إِلَّا إِيَّاهُ وَبِالْوَالِدَيْنِ إِحْسَانًا ۖ إِنَّمَا يُبَلِّغَنَّ عَنْكَ الْكِبَرُ أَحَدُهُمَا أَوْ

كِلَاهُمَا فَلَا تَقُلْ لَهُمَا أُفٍّ ۖ وَلَا تَنْهَرُهُمَا وَقُلْ لَهُمَا قَوْلًا كَرِيمًا ۚ ٢٣

Yang bermaksud: “Dan Tuhanmu telah perintahkan, supaya engkau tidak menyembah melainkan kepada-Nya semata-mata, dan hendaklah engkau berbuat baik kepada ibu bapa. Jika salah seorang dari keduanya, atau kedua-duanya sekali, sampai kepada umur tua dalam jagaan dan peliharaanmu, maka janganlah engkau berkata kepada mereka (sebarang perkataan kasar) sekalipun perkataan "Ah", dan janganlah engkau menengking menyergah mereka, tetapi katakanlah kepada mereka perkataan yang mulia (yang bersopan santun).”

Rasulullah SAW bersabda yang bermaksud: “Redha Allah itu bergantung pada redha ibu bapa. Dan murka-Nya juga bergantung pada murka ibu bapa.” (Riwayat Tirmizi).

Oleh kerana itu, berbuat baik kepada kedua ibu bapa dianggap oleh Allah dan Rasul-Nya sebagai salah satu amalan mulia yang dapat membawa pelakunya meraih ‘tiket’ ke syurga. Bagi wanita yang belum berkahwin, keutamaannya ialah kedua-dua ibu bapanya. Namun, ini tidak bermakna seorang anak perempuan itu boleh melupakan ibu bapanya setelah dia berkahwin. Terdapat pelbagai kewajipan anak terhadap kedua-dua ibu bapanya (Siti Nor Bahyah Mahamood & Ida Ezyani Othman, 2008).

v. Sentiasa berbuat baik dalam keadaan sempit mahupun dalam keadaan lapang. Salah satu cara untuk berbuat baik dengan manusia adalah dengan bersedekah secara ikhlas. Sikap suka bersedekah merupakan salah satu ciri dari kesempurnaan iman seorang muslim. Islam dengan tegas menyatakan bahawa seseorang itu tidak akan pernah mencapai keimanan yang sempurna dan meraih kebajikan, sebelum dia mampu

memberikan (menginfakkan) sebahagian dari sesuatu harta yang dicintainya kepada orang lain. Ini kerana, dalam pandangan Islam, kesolehan itu bukan hanya bersifat individu, tetapi juga harus mahu berinfak, beramal dan bersedekah kepada orang lain (Firanda Andirja (2013). Allah berfirman dalam surah al-Munafiqun ayat 10:

وَأَنْفِقُوا مِنْ مَّا رَزَقْنَاكُمْ مِنْ قَبْلِ أَنْ يَأْتِيَّ أَحَدَكُمُ الْمَوْتُ فَيَقُولَ رَبِّ لَوْلَا أَخَّرْتَنِي إِلَىٰ أَجَلٍ قَرِيبٍ
فَأَصَّدَّقَ وَأَكُن مِنَ الصَّالِحِينَ ١٠

Yang bermaksud: “Dan belanjakanlah (dermakanlah) sebahagian dari rezeki yang Kami berikan kepada kamu sebelum seseorang dari kamu sampai ajal maut kepada-Nya, (kalau tidak) maka ia (pada saat itu) akan merayu dengan katanya: "Wahai Tuhanku! Alangkah baiknya kalau Engkau lambatkan kedatangan ajal matiku - ke suatu masa yang sedikit sahaja lagi, supaya aku dapat bersedekah dan dapat pula aku menjadi dari orang-orang Yang soleh.”

vi. Berbuat baik dengan jiran. Setiap wanita solehah hendaklah berbuat baik kepada jiran mereka yang terdekat. Dengan cara seperti ini dapat merapatkan hubungan antara satu dengan yang lain, yang mana dengan berbuat baik kepada jiran ini banyak faedah dan manfaatnya (Amina Noor, 1999). Jiran tetangga ialah orang yang sentiasa berinteraksi dengan kita dalam kehidupan seharian. Mereka adalah orang pertama yang membantu dan menolong kita di masa kita ditimpa kesulitan. Oleh kerana itulah, Allah SWT memerintahkan kepada setiap yang bergelar muslimah agar sentiasa menghormati dan berbuat baik pada jiran tetangga (Al-Sutha, 2014).

2.3 Taat Kepada Suami

Hak suami merupakan tanggungjawab yang wajib dilaksanakan oleh isteri, hak suami adalah tanggungjawab yang tidak seharusnya diabaikan oleh isteri apabila berlangsungnya akad perkahwinan di antara mereka berdua. Hak suami atas isterinya adalah suatu yang perlu dijaga. Mengabaikan boleh menyebabkan akibat yang buruk di dunia dan di akhirat. Ini kerana kunci untuk memasuki syurga bagi isteri terletak pada keredaan suaminya. Seperti babda Nabi SAW:

لَوْ كُنْتُ أَمْرًا أَحَدًا أَنَّ يَسْجُدَ لِأَحَدٍ لَأَمَرْتُ الْمَرْأَةَ أَنْ تَسْجُدَ لِزَوْجِهَا Maksudnya:

“Jika aku ingin menyuruh seseorang untuk sujud kepada seseorang, pasti aku menyuruh seorang perempuan untuk sujud kepada suaminya”. (Hadis Riwayat al-Tarmizi No.1159). Hadis ini jelas menunjukkan kedudukan suami serta tanggungjawab yang mesti dilaksanakan oleh isteri ke atas suaminya. Perbuatan sujud di dalam Islam lazimnya dilakukan oleh manusia sebagai hamba kepada pencipta iaitu khalik. Justeru itu, hadis tersebut cuba menggambarkan betapa seorang isteri wajib mematuhi, menghormati dan mentaati suaminya kecuali dalam perkara-perkara maksiat dan mungkar.

Taat kepada suami merupakan satu kewajipan seorang wanita muslimah setelah taat kepada Allah SWT. Ini kerana, dia wajib mengutamakan suaminya dalam segenap perkara. Wanita juga perlu memikirkan cara untuk menjadikan dirinya sentiasa disayangi dan dicintai oleh suaminya. Seperti yang diketahui, tanggungjawab seorang isteri bermula sebaik sahaja akad nikah dilafazkan. Perkahwinan ini bermakna bermulalah tugas wanita sebagai isteri untuk sehidup semati bersama suaminya (Siti

Nor Bahyah Mahamood & Ida Ezyani Othman, 2008). Rasulullah SAW bersabda yang bermaksud: “Apabila seorang lelaki megajak isterinya ke tempat tidur dan dia tidak mahu memenuhinya sehingga suaminya marah kepadanya, maka malaikat akan terus melaknatnya sampai subuh.” (Riwayat Bukhari dan Muslim).

Di antara ketaatan yang harus dilakukan seorang isteri adalah untuk tetap duduk di rumah sahaja sebagai suri rumah, ia tidak boleh keluar kecuali apabila diizinkan. Apabila ia keluar dengan sengaja tanpa meminta izin daripada suaminya terlebih dahulu ia dianggap telah melakukan nusyuz (Atiyyah Saqr, 2002).

3. SIFAT-SIFAT WANITA MITHALI BERDASARKAN KISAH DALAM AL-QURAN

Dalam al-Quran, Allah SWT menceritakan pelbagai jenis kisah untuk kita teladani dan jadikan iktibar sebagai panduan dalam kehidupan seharian. Allah tidak hanya mengisahkan perihal kisah kaum terdahulu, tetapi juga pelbagai bentuk akidah, ibadah, muamalat dan sebagainya. Allah juga ada menjelaskan mengenai jenis wanita dalam al-Quran yang semua cerita ini untuk hamba-Nya, khususnya wanita bagi diaplikasikan dalam kehidupan yang sedang dijalani. Ada antara yang bersifat positif dan ada yang bersifat negatif. Ada yang patut dicontohi, dan ada yang harus kita jauhi. Pegangan akidah yang bertunjangkan tauhid kepada Allah merupakan suatu yang sangat bernilai bagi setiap orang Islam. Ia adalah cahaya yang menyinari hidup insan dan penyelamat dalam mengharungi sengsara kacau-bilau pada hari pembalasan. Perkembangan

dakwah pada peringkat awal banyak dibantu oleh kesabaran kaum muslimin dan muslimat dalam mempertahankan pegangan aqidah mereka. Sikap inilah yang membuahkan hasil yang amat berharga dalam sejarah perkembangan Islam hinggalah ke hari ini. Islam masih kekal dan terus mekar dalam jiwa setiap umat Islam. Terdapat banyak kisah dalam al-Quran yang menceritakan tentang sifat-sifat wanita mithali seperti Siti Hajar, Maryam dan ramai lagi.

3.1 Siti Hajar Wanita Penyabar Dan Berjiwa Tawakkal

Setiap kali datang Aidiladha kita akan mengulangi cerita mengenai pengorbanan. Ramai orang yang meneguk air zam-zam, tetapi tidak meneguk Ibrah (pengajaran) daripada wanita yang mula-mula menyentuh air itu. Siti Hajar asalnya seorang khadam kepada Nabi Ibrahim a.s dan isterinya Siti Sarah. Siti Hajar adalah seorang dayang hadiah daripada raja Mesir yang berasal dari Qibti, kemudian mengikut tuannya berpindah ke Palestin. Beliau seorang yang baik, rajin dan ikhlas berbakti kepada Siti Sarah. Akhlak yang mulia serta muamalah yang baik ini membuatkan Siti Sarah menghormati dan melayaninya seperti seorang kawan. Nabi Ibrahim a.s lalu mengajak Siti Hajar r.a beriman kepada Allah SWT. Siti Hajar mengimani-Nya dan mengimani bahawa Nabi Ibrahim adalah pesuruh Allah. Setelah Siti Hajar berkahwin dengan Nabi Ibrahim dan mengandung, timbul sedikit cemburu di hati Siti Sarah. Siti Hajar mempunyai hati seperti emas kerana diuji dengan pelbagai dimensi seperti hidup bermadu, fizikalnya diuji ketika ditinggalkan di padang pasir. Akalnya pula diuji dengan ikhtiar tanpa bekalan, jiwanya

diuji dengan tawakal, sabar dan bersangka baik kepada Allah s.w.t dan suami. Firman Allah SWT dalam surah Ibrahim ayat 37:

رَبَّنَا إِنِّي أَسْكَنْتُ مِنْ ذُرِّيَّتِي بِوَادٍ غَيْرِ ذِي زَرْعٍ عِنْدَ بَيْتِكَ الْمُحَرَّمِ رَبَّنَا لِيُقِيمُوا الصَّلَاةَ
فَأَجْعَلْ أَفْئِدَةً مِنَ النَّاسِ تَهْوِي إِلَيْهِمْ وَارْزُقْهُمْ مِنَ الثَّمَرَاتِ لَعَلَّهُمْ يَشْكُرُونَ ۝ ٣٧

Yang bermaksud: “Wahai Tuhan kami! Sesungguhnya aku telah menempatkan sebahagian dari zuriat keturunanku di sebuah lembah (tanah suci Makkah) yang tidak tanaman padanya, di sisi rumahmu yang diharamkan mencerobohnya. Wahai Tuhan kami, (mereka ditempatkan di situ) supaya mereka mendirikan sembahyang (dan memakmurkannya dengan ibadat). Oleh itu, jadikanlah hati sebahagian dari manusia tertarik gemar kepada mereka, (supaya datang beramai-ramai ke situ), dan kurniakanlah rezeki kepada mereka dari berbagai jenis buah-buahan dan hasil tanaman, semoga mereka bersyukur.”

Dalam ayat ini jelas menunjukkan betapa sabarnya Siti Hajar terhadap dugaan yang diberikan dimana Nabi Ibrahim a.s membawanya berpindah ke suatu tempat untuk mengelakkan dari berlakunya kecemburuan Sarah dan Hajar. Berlaku kejadian di mana bekalan air telah habis yang mengakibatkan susunya kering, sementara anaknya Ismail menangis mahu menyusu, maka Hajar berlari-lari dari bukit Safa ke Marwa untuk mencari air dan melihat jika ada kelibat manusia untuk dia memohon pertolongan. Setelah berusaha, turunlah bantuan dari Allah SWT berupa malaikat yang menguis-nguiskan tumit Ismail pada padang pasir dan memancarkan air zam-zam. Yang mana air zam-zam tersebut memberi

keberkatan kepada pelusuk alam sehingga hari kiamat. Dalam bermacam perkara yang dialami, hatinya tetap tenang dengan kepercayaannya terhadap Tuhannya yang tidak sekali-kali akan memberi kesusahan dan kesempitan hambanya. Dengan ini jelas menunjukkan bahawa Hajar merupakan seorang wanita yang sangat penyabar, tabah dan kental jiwanya apabila ditimpa musibah (Khairul Naim Mansor 2019).

Siti Hajar r.a sentiasa diuji sepanjang hidupnya. Beliau bukan sahaja diuji di dalam rumahnya dan diuji dengan suaminya tetapi juga diuji pada anaknya. Pengorbanan Siti Hajar membuktikan betapa tingginya tahap keimanan dan kesabarannya. Beliau adalah muslimah mithali yang penyabar, tabah serta kental jiwanya. Oleh itu, sebagai seorang muslimah yang ingin menjadi wanita mithali wajib mencontohi Siti Hajar yang penyabar dan berjiwa tawakal walaupun menghadapi pelbagai dugaan dan cabaran.

3.2 Maryam Wanita Yang Memelihara Kehormatan

Manusia tidak kira lelaki dan wanita diciptakan untuk mengabdikan diri kepada Allah dengan ketaatan yang penuh, sekali gus mengisi kehidupan dunia berdasarkan aturan yang ditetapkan yang mempunyai tugas serta peranan masing-masing. Sebagai seorang muslimah, kesemua peranan itu perlu dilakukan secara maksimum yang mungkin, untuk mengejar cita-cita menjadi wanita mithali penghuni syurga. Kewajipan utama wanita mithali tentu sekali untuk mengabdikan diri dan menyembah hanya kepada Allah SWT yang bermakna tiada satu yang berhak diikuti selain daripada yang diperintahkan-Nya. Maryam binti Imran, dialah ibunda

Nabi Isa a.s. Maryam menjadi figure atau tokoh wanita mithali yang menjaga kehormatan dirinya dan taat beribadah kepada tuhan. Beliau rela mengorbankan masa remajanya untuk bermunajat mendekatkan diri pada Allah, sehingga Allah memberinya hadiah istimewa berupa kelahiran seorang Nabi dari rahimnya tanpa bapa. Firman Allah dalam surah al-Anbiya' ayat 91:

وَالَّتِي أَحْصَنَتْ فَرْجَهَا فَنَفَخْنَا فِيهَا مِنْ رُوحِنَا وَجَعَلْنَاهَا آيَةً لِلْعَالَمِينَ ٩١

Yang bermaksud: “Dan (sebutkanlah peristiwa) perempuan yang telah menjaga kehormatan dan kesuciannya; lalu kami tiupkan padanya dari roh (ciptaan) kami, dan kami jadikan dia dan anaknya sebagai satu tanda (yang menunjukkan kekuasaan kami) bagi umat manusia.”

Dalam ayat ini mengisahkan tentang Maryam seorang wanita yang memelihara kehormatan dirinya. Suatu ketika Allah SWT mengutus malaikat Jibril untuk memberitahu Maryam bahawa Allah meniupkan roh ke dalam tubuhnya sehingga dia mengandung. Kemudian, Maryam melahirkan anaknya, Isa a.s tanpa bapa. Oleh itu, Isa a.s lahir tanpa bapa sehingga Maryam dan Isa a.s menjadi salah satu bukti bagi seluruh isi alam ini tentang kekuasaan Allah sebagaimana perihal Nabi Adam a.s yang lahir ke dunia tanpa ibu dan bapa, sedangkan Isa a.s lahir tanpa bapa sahaja (Khairul Naim Mansor 2019).

Maryam merupakan seorang wanita yang cukup menjaga kesucian dan kehormatan dirinya. Beliau tidak bergaul dengan lelaki yang bukan mahramnya. Malah, beliau juga menjauhi sebarang godaan daripada

mana-mana lelaki. Pernah suatu ketika Allah SWT mengutus malaikat Jibril untuk datang mendekati Maryam dengan menyerupai sebagai seorang lelaki yang tampan untuk menggoda Maryam. Akan tetapi Maryam tidak sedikit pun tergoda dengan lelaki tersebut. Malah beliau berlindung kepada Allah SWT dan meminta lelaki itu untuk menjauh (Nurfitri Hadi, 2015). Dengan kisah ringkas ini dapat memberi pengajaran kepada wanita untuk mencontohi cara Maryam menjaga kesucian dan kehormatan dirinya.

3.3 Zainab Binti Jahsy Wanita Muslimah Yang Taat Kepada Allah Dan Rasul.

Zainab binti Jahsy adalah isteri Rasulullah SAW. Zainab termasuk wanita pertama yang memeluk Islam. Allah pun telah menerangi hati ayah dan keluarganya sehingga memeluk Islam. Dia berhijrah ke Madinah bersama keluarganya ketika beliau masih remaja. Zainab termasuk wanita yang taat dalam beragama, wara', dermawan, dan baik. Selain itu, dia juga terkenal dengan sifat mulia, cantik serta termasuk wanita yang sering mendapat perhatian di Makkah. Sebelum berkahwin dengan Rasulullah, namanya adalah Barrah, kemudian diganti oleh Rasulullah menjadi Zainab setelah berkahwin (M. Nurdin Fathurrohman, 2014).

Dinyatakan dalam hadis sahih, dari Zainab binti Abu Salamah, dia berkata, "Namaku adalah Barrah, akan tetapi Rasulullah kemudian

memberiku nama Zainab.” (Hadis Riwayat Muslim dalam Al-Adab, 14/140). Firman Allah SWT dalam surah al-Saff ayat 11:

تُؤْمِنُونَ بِاللَّهِ وَرَسُولِهِ ۖ وَتُجَاهِدُونَ فِي سَبِيلِ اللَّهِ بِأَمْوَالِكُمْ وَأَنْفُسِكُمْ ۖ ذَٰلِكُمْ خَيْرٌ لَّكُمْ إِن كُنْتُمْ تَعْلَمُونَ ۙ ۱۱

Yang bermaksud: “Iaitu, kamu beriman kepada Allah dan Rasul-Nya, serta kamu berjuang membela dan menegakkan agama Allah dengan harta benda dan diri kamu; yang demikian itulah yang lebih baik bagi kamu, jika kamu hendak mengetahui (hakikat yang sebenarnya).”

Dalam ayat ini menjelaskan tentang taatnya Zainab kepada Allah SWT dan Rasul-Nya apabila beliau diminta persetujuan oleh Rasulullah s.a.w untuk dikahwinkan dengan Zaid bin Haritsah yang hanya seorang hamba sahaya sebelum beliau berkahwin dengannya. Zainab menerima permintaan dan menyetujui hasrat Rasulullah SAW. Beliau menyedari bahawa ketaatannya terhadap hasrat Rasulullah s.a.w pasti berkaitan dengan hukum syariah. Ini jelas menunjukkan bahawa Zainab binti Jahsy ini merupakan seorang wanita yang sangat taat kepada Allah dan Rasul-Nya kerana sanggup bersetuju untuk berkahwin dengan Zaid setelah diminta oleh Rasulullah SAW walaupun bukan atas kehendaknya (Khairul Naim Mansor 2019). Ini menunjukkan bahawa beliau tahu akan kebbaikannya. Sifat seperti inilah yang harus dicontohi oleh para wanita muslimah masa kini.

4. KESIMPULAN

Sebagai kesimpulan, untuk menjadi seorang wanita muslimah mithali haruslah taat kepada Allah SWT dan Rasul-Nya. Tidak lupa juga bagi wanita yang sudah berkahwin, mestilah taat kepada suami untuk mendapat ganjaran di akhirat kelak. Seorang wanita muslimah mithali mestilah mencontohi sifat-sifat pada tokoh-tokoh wanita zaman Islam seperti Siti Hajar, Maryam, Zainab dan isteri-isteri Rasulullah yang lain dimana mereka bukan sahaja cantik pada akhlakunya bahkan mereka juga kuat dan tabah dalam menghadapi ujian yang diberikan oleh Allah SWT. Kajian ini dapat memudahkan pelajar untuk memahami konsep wanita muslimah mithali menurut perspektif al-Quran dengan mendatangkan kisah-kisah wanita di dalam al-Quran supaya dapat mencontohi sifat-sifat dan juga akhlak tokoh wanita zaman Islam. Begitu juga Nabi SAW pernah menyebut berkenaan empat perkara yang menjadi kebahagiaan seseorang lelaki yang beriman, iaitu: *الْمَرْأَةُ الصَّالِحَةُ وَالْمَسْكَنُ الْوَاسِعُ وَالْجَارُ الصَّالِحُ وَالْمَرْكَبُ الْهَيِّئُ* Maksudnya:

“Wanita (isteri) yang solehah, tempat tinggal yang luas/lapang, jiran yang soleh dan kenderaan yang selesa.” (Hadith Riwayat Ibn Hibban No.4031 dan Ahmad No.1448).

Kami akhiri dengan doa kepada Allah: *رَبَّنَا هَبْ لَنَا مِنْ أَزْوَاجِنَا وَذُرِّيَّاتِنَا قُرَّةَ أَعْيُنٍ*

وَاجْعَلْنَا لِلْمُتَّقِينَ إِمَامًا

Maksudnya: *"Wahai Tuhan kami, berilah kami beroleh dari isteri-isteri dan zuriat keturunan kami: perkara-perkara yang menyukakan hati melihatnya, dan jadikanlah kami imam ikutan bagi orang-orang yang (mahu) bertaqwa.”* (Surah al-Furqan: 74)

5. RUJUKAN

Abdullah bin Muhammad Basmieh (2000), *Tafsir Pimpinan Ar-Rahman Kepada Pengertian al-Qur'an 30 Juzuk*, Kuala Lumpur: Dar al-Fikr.

Al-Bukhari, Muhammad bin Ismail al-Mughirah al-Ja'fai (1994), *Mukhtasar Sahih Bukhari, Al-Musamma Al-Tajrid Al-Sahih. Cet.5*, Damsyik Syria: Maktabah Dar al-Iman.

Muslim, Abu al-Husain Muslim bin al-Hajjaj al-Qushayri al-Nisaburi (2009), *Sahih Muslim*, Bairut Lubnan: Dar al-Kutub al-Ilmiyyah.

Asyraf Ab Rahman (2010). *Peranan wanita dalam pembangunan keluarga dari perspektif Fi Zilal Al-Quran*, Journal of Governance and Development, Tahun 2010, Vol 6.

Azizi Ahmad (2017), *Pensabitan isteri nusyuz menurut undang-undang keluarga Islam*. Disertasi Ijazah Sarjana Syariah Dan Undang-Undang, Akademi Pengajian Islam, Universiti Malaya, Kuala Lumpur.

Shikin Ali (2013), *Isteri Mithali: Satu kajian persepsi isteri dalam novel dan masyarakat melayu*. Tesis Ijazah Sarjana, Jabatan Pengajian Melayu, National University of Singapore.

Saiful Hadi Al-Sutha (2014), *50 Amalan Menempah Tiket Ke Syurga*, Terj. Nur Thairah Syamsuddin, Selangor: Al-Hidayah House of Publisher Sdn Bhd.

Nik Haslinda Nik Hussain (2007), *Peranan Institusi Keluarga dalam Penjanaan Bangsa Bertamadun*, Jurnal Kemanusiaan bil.9, Jun 2007, Pusat Pengajian Ilmu Kemanusiaan Universiti Sains Malaysia.

Siti Nor Bahyah Mahamood & Ida Ezyani Othman (2008), *Hadiah Buat Muslimah: Panduan Asas Fiqah Wanita*, Kuala Lumpur: Telaga Biru Sdn Bhd.

Saodah Abd Rahman (2010), *Wanita & Cabaran Zaman*, Kuala Lumpur: Yayasan Dakwah Islamiah Malaysia.

Naurah Muhammad Sa'id (2011), *Wanita Berpakaian Tapi Telanjang*, Penerbit: *Kiswah Media. Bantul, Yogyakarta*.

Abdurrahman Nashir as-Sa'di (2003), *Taîsîr al-Karîm al-Rahmân Fî Tafsîr Kalâm al-Mannân*, Beirut: Dar Ibnu Hazm.

Atiyyah Saqr (2002), *Soal Jawab Wanita Islam*. Terj. Rosli Alias & Mohd Yusuf Haji Abdullah, Kuala Lumpur: Yayasan Dakwah Islamiah Malaysia.

Ahmad Yani Abd Manaf, Muhd Syamel Yusoff & Khairul Naim Mansor, *319 Tafsir Mengikut Tema Istimewa Untuk Muslimah; Al-Quran Untuk Hidup Anda*, Shah Alam, Selangor: Karya Bestari Sdn Bhd.

Abu Azka Al-Madani & Harun Arrasyid Hj Tuskan (2004), *70 Wanita Terbilang Di Zaman Nabi Muhammad S.A.W.* Kuala Lumpur: Al-Hidayah Publishers.

Al-Ghazali, Muḥammad bin Aḥmad (2012). *Mari Kita Terbang Ke Syurga*. Terj. Azarita Ahmad. Selangor: Al-Hidayah House of Publishers Sdn Bhd.

Noorsuriati Talib & Mohd Radzali Masrum (2007), *Ummahatul Mukminin: Wanita Anggun Penyeri Alam*, Kuala Lumpur: Pustaka Yamien Sdn Bhd.

Al-Bukhari, Muhammad bin Ismail al-Mughirah al-Ja'fai (1999), kitab Al-Libas, Bab: "*Irdaḡ ar-Rajul Khalfā ar-Rajul*", 4/84; dan Muslim (2008),

kitab Al-Iman, Bab: “*Ad-Dalil ‘ala anna man maata ala at-tauhid dakhala al-jannah.*”

Siti Muslihah binti Mustakim (2007), *Isu wanita dalam Al-Quran: Tumpuan terhadap Surah Al-Nur*. Universiti Malaya.

Aziah Tajudin & Mohd Fazli Tajuid (2016), *Kamus Pelajar Bahasa Melayu Dewan*, Edisi kedua, Dewan Bahasa dan Pustaka.

Amina Noor (1999), *Andalah Wanita Syurga*, Kuala Lumpur Malaysia: Darul Nu'man.

Muhammad Syaari Abdul Rahman (2019), *Perempuan Yang Baik-baik Dalam al-Quran*, Seri Kembangan Iman Publication.

Abu Ahmad Fatanah (2009), *10 Golongan Tidak Mendapat Syafaat Nabi S.A.W.* Kuala Lumpur: Al-Hidayah Publications.